

Komunikadu Imprensa
16 Setembru 2025
Parlamentu Nasionál

**Prezidente-Repúblika ezije entidade Estado tomak transforma
independénsia nasionál ba dezvoltamentu sustentável iha abertura
sesaun lejislativa datoluk Lejislatura Da-neen Parlamentu Nasionál:
JSMP enkoraja Prezidente promove solusaun ba ezijénsia públiku nian**

Iha 15 Setembru 2025, Parlamentu Nasionál realiza serimónia abertura ba sesaun lejislativa iha Lejislatura Da-neen através plenária ordinária, ne'ebé prezide hosi Prezidente PN, distinta deputada Maria Fernanda Lay ho prezensa Exelénsia Prezidente Repúblika Demokrátika Timor-Leste, Dr. José Ramos Horta, governante sira, entidade públiku sira Estado nian no korpu-diplomátiku sira.

Plenária ne'e hahú ho intervensaun no deklarasaun polítika hosi Bankada Parlamentár sira hosi Bankada CNRT, PD, FRETILIN, KHUNTO no PLP, diskursu Prezidente Parlamentu Nasionál no ensa ho mensajen no diskursu Estado hosi Exelénsia Prezidente Repúblika, Dr. José Ramos Horta.

Iha Prezidente-Repúblika ninia diskursu subliña prátika di'ak sira kona-ba polítika administrativa, serbisu operasionál no finanseira ne'ebé introdús iha interna Prezidénsia Repúblika hamutuk ho iniciativa sira seluk kona-ba programa “*dapur ba povu, abitasaun sosiál no asaun sosiál, programa hakbiit feto, klínika ba povu, palásiu abertu*”, no sel-seluk tan.

Alende ne'e, Prezidente-Repúblika mós reafirma ezijénsia atu transforma independénsia nasionál ba dezvoltamentu sustentável no promove oportunidade hanesan no justisa sosiál ba sidadaun timoroan hotu-hotu, hodi fó onra ba sakrifísiu hosi sira ne'ebé dedika sira nia vida ba ita nia liberdade no independénsia totál.

“JSMP fiar katak Prezidente Repúblika iha poder Konstitusionál plena atu ezije entidade Estado tomak hodi halo mundansa no transforma vizaun Estado ba interesse komún no asegura ben-estar ba povu tomak, la'ós ben-estar polítiku sira”, dehan Sra. Ana Paula Marcal, Diretora Ezekutiva JSMP.

Iha realidade, JSMP regista polítika públiku sira ne'ebé deputadu sira, membru governu inklui Prezidente Repúblika rasik dalabarak lakon

kapasidade institusionál, konsiénsia sosiál no sentidu responsabilidade atu reflète no hatan ba realidade sosiál-ekonómika povu nian.

Iha kazu atuál, protestu no reazen to'o manifestasaun ne'ebé estudante sira lidera nu'udar forma ida hosi krítika públiku ba komportamentu polítiku ukun na'in sira ne'ebé projeta lei ba benefisia de'it sira nia interesse pesoál no partidária.

Lista naruk kona-ba subsídiu no regalias ezajeradu ba deputadu/a Parlamentu Nasionál ne'ebé kauza protesta hosi nível sociedade tomak, tuir loloos tenke sai tema sentrái iha diskursu Estadu hosi Presidente-Repúbliku nu'udar aktu no jestu krítiku Presidente ba deputadu sira, la'ós halo de'it diskursu retórica serimoniál de'it.

Presidente-Repúblika tenke sensível, alertadu no hatudu empatia ho lian públiku ne'ebé durante tinan barak halerik kontra lideransa insituitisaun Estadu sira ne'ebé viola sira ninia devér institusionál atu fornese no aseguara moris di'ak ba povu.

Iha situasaun sira hanesan dadaun estudante no sociedade sivil tun ba dalan hodi protesta subsídiu no regalias oioin hosi órgaun lejislativu, deputadu/a sira ne'ebé tuir lei no Konstituisaun representa povu, ezije solusaun real hosi lideransa Estadu sira, partikularmente Presidente-Repúblika, la'ós mensajen kamuflase, desviu no ignoránsia.

JSMP ezije Presidente-Repúblika atu ezerse ninia kompeténsia hodi enkoraja solusaun entre órgaun soberanu sira, envesde halo diskursu serimoniál ne'ebé laiha sentidu tanba lakon kapasidade atu fó solusaun ba problema real ne'ebé povu atravesa hela.

Atu hetan informasaun kompletu favor kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl